

D.R. 25/2019

**RANG UNDANG-UNDANG SURUHANJAYA BEBAS
ADUAN SALAH LAKU POLIS 2019**

SUSUNAN FASAL

BAHAGIAN I

PERMULAAN

Fasal

1. Tajuk ringkas dan permulaan kuat kuasa
2. Tafsiran

BAHAGIAN II

PENUBUHAN, FUNGSI DAN KUASA SURUHANJAYA

3. Penubuhan Suruhanjaya
4. Fungsi Suruhanjaya
5. Kuasa Suruhanjaya
6. Anggota Suruhanjaya
7. Tempoh jawatan
8. Saraan
9. Pengosongan jawatan
10. Mesyuarat
11. Penjalanan sementara fungsi Pengerusi
12. Penzahiran kepentingan
13. Pewakilan fungsi dan kuasa Suruhanjaya

BAHAGIAN III

PENTADBIRAN

14. Setiausaha
15. Penjalanan sementara fungsi Setiausaha

Fasal

16. Pegawai
17. Perunding
18. Jawatankuasa
19. Kad kuasa
20. Penggunaan kakitangan atau kemudahan jabatan kerajaan, dsb.
21. Kerjasama dengan agensi lain

BAHAGIAN IV

ADUAN SALAH LAKU

22. Skop salah laku
23. Jawatankuasa Aduan
24. Aduan terhadap polis
25. Pengelasan aduan

BAHAGIAN V

KUASA PENYIASATAN

26. Kuasa untuk memeriksa orang
27. Kuasa untuk memperoleh dokumen atau benda lain
28. Dapatan penyiasatan
29. Pasukan Petugas
30. Suruhanjaya boleh memulakan penyiasatan

BAHAGIAN VI

PROSIDING MENANGANI SALAH LAKU

31. Kuasa tatatertib
32. Prosiding untuk menangani salah laku
33. Hukuman salah laku

BAHAGIAN VII

KESALAHAN

Fasal

34. Ugutan terhadap orang yang memberikan keterangan
35. Penghinaan

BAHAGIAN VIII

PELBAGAI

36. Surcaj
37. Pembekalan maklumat
38. Perlindungan daripada liabiliti
39. Penguntukan wang tahunan
40. Akta Badan Berkanun (Akaun dan Laporan Tahunan) 1980
41. Laporan tahunan
42. Akta Perlindungan Pihak Berkuasa Awam 1948
43. Pekhidmat awam
44. Obligasi kerahsiaan
45. Pemulaan dan penjalanan pendakwaan
46. Perlindungan orang yang membantu Suruhanjaya
47. Tanggungjawab untuk merujuk kes cedera parah atau kematian dalam jagaan
48. Pasukan polis hendaklah membekalkan maklumat
49. Kuasa meminda Jadual
50. Peraturan-peraturan

BAHAGIAN IX

PERUNTUKAN PEMANSUHAN, KECUALIAN DAN PERALIHAN

51. Pemansuhan dan pembubaran
52. Pesuruhjaya Suruhanjaya dibubarkan
53. Pemindahan kuasa, hak, dsb.

Fasal

54. Pemindahan wang dalam dana Suruhanjaya dibubarkan
55. Peletakhakan harta, dsb.
56. Perjanjian sedia ada, dsb.
57. Pegawai dan staf Suruhanjaya dibubarkan disifatkan pegawai Suruhanjaya
58. Aduan, dsb., agensi penguatkuasaan selain Polis Diraja Malaysia
59. Penerusan aduan, dsb., salah laku polis
60. Penerusan prosiding tatatertib yang belum selesai berhubung dengan salah laku di hadapan Pihak Berkuasa Tatatertib polis

JADUAL

RANG UNDANG-UNDANG

b e r n a m a

Suatu Akta untuk mengadakan peruntukan bagi penubuhan Suruhanjaya Bebas Aduan Salah Laku Polis dan untuk mengadakan peruntukan mengenai fungsi dan kuasanya, termasuklah perkara yang berhubungan dengan aduan salah laku, siasatan salah laku, prosiding untuk menangani salah laku dsb., dan mengenai perkara lain yang berkaitan dengannya.

DIPERBUAT oleh Parlimen Malaysia seperti yang berikut:

[]

BAHAGIAN I

PERMULAAN

Tajuk ringkas dan permulaan kuat kuasa

1. (1) Akta ini bolehlah dinamakan Akta Suruhanjaya Bebas Aduan Salah Laku Polis 2019.

(2) Akta ini mula berkuat kuasa pada tarikh yang ditetapkan oleh Perdana Menteri melalui pemberitahuan dalam *Warta*.

Tafsiran

2. Dalam Akta ini, melainkan jika konteksnya menghendaki makna yang lain—

“anggota pasukan polis” ertinya mana-mana anggota pasukan polis yang ditubuhkan di bawah Perkara 132 Perlembagaan Persekutuan;

“anggota Suruhanjaya” ertinya Pengerusi, Timbalan Pengerusi dan anggota Suruhanjaya lain yang dilantik di bawah seksyen 6;

“badan awam” termasuklah—

(a) Kerajaan Malaysia;

(b) Kerajaan Negeri;

(c) mana-mana pihak berkuasa tempatan dan mana-mana pihak berkuasa berkanun yang lain; dan

(d) mana-mana jabatan atau perkhidmatan Kerajaan Malaysia, Kerajaan Negeri, atau pihak berkuasa tempatan;

“jawatankuasa” ertinya mana-mana jawatankuasa yang ditubuhkan di bawah seksyen 18;

“Jawatankuasa Aduan” ertinya Jawatankuasa Aduan yang ditubuhkan di bawah seksyen 23;

“Lembaga Tatatertib” ertinya Lembaga Tatatertib yang ditubuhkan di bawah subseksyen 31(3);

“Pasukan Petugas” ertinya suatu Pasukan Petugas yang ditubuhkan di bawah seksyen 29;

“pegawai Suruhanjaya” ertinya pegawai yang dilantik oleh Suruhanjaya di bawah seksyen 16 dan termasuklah Setiausaha yang dilantik di bawah seksyen 14;

“salah laku” ertinya salah laku sebagaimana yang dinyatakan di bawah seksyen 22;

“Suruhanjaya” ertinya Suruhanjaya Bebas Aduan Salah Laku Polis yang ditubuhkan di bawah seksyen 3.

BAHAGIAN II

PENUBUHAN, FUNGSI DAN KUASA SURUHANJAYA

Penubuhan Suruhanjaya

3. (1) Suruhanjaya Bebas Aduan Salah Laku Polis ditubuhkan.

(2) Suruhanjaya hendaklah menjadi pertubuhan perbadanan yang kekal turun-temurun dan mempunyai meterai perbadanan.

(3) Suruhanjaya boleh membawa guaman dan dibawa guaman terhadapnya atas namanya.

(4) Suruhanjaya boleh, tertakluk kepada dan bagi maksud Akta ini, atas apa-apa terma yang difikirkan patut oleh Suruhanjaya dan bagi maksud Akta ini—

(a) membuat kontrak;

(b) memperoleh, membeli, mengambil, memegang dan menikmati apa-apa jenis harta alih dan harta tak alih; dan

(c) memindahkan, menyerahhakkan, menyerahkan balik, memulangkan, menggadaikan, menggadai janji, mendemis, menyerahhakkan semula, memindahkan hakmilik atau dengan apa-apa cara lain melupuskan, atau membuat apa-apa urusan mengenai, apa-apa harta alih atau harta tak alih atau apa-apa kepentingan mengenai harta itu yang terletak hak pada Suruhanjaya.

Fungsi Suruhanjaya

4. Fungsi Suruhanjaya adalah seperti yang berikut:

(a) untuk menggalakkan integriti dalam kalangan pasukan polis;

(b) untuk melindungi kepentingan orang awam melalui pencegahan dan penanganan salah laku mana-mana anggota pasukan polis;

(c) untuk membentuk dan mengadakan mekanisme bagi mengesan, menyiasat dan mencegah salah laku oleh mana-mana anggota pasukan polis;

- (d) untuk menasihati Kerajaan dan membuat syor berhubung dengan langkah-langkah yang sesuai untuk diambil dalam menggalakkan integriti dalam kalangan anggota pasukan polis; dan
- (e) untuk menjalankan kawalan tatatertib terhadap semua anggota pasukan polis mengikut apa-apa cara yang diperuntukkan dalam Akta ini atau mana-mana undang-undang bertulis.

Kuasa Suruhanjaya

5. (1) Suruhanjaya hendaklah mempunyai kuasa dan boleh menjalankan apa-apa benda yang perlu atau suai manfaat bagi, atau berkaitan dengan, pelaksanaan fungsinya di bawah Akta ini.

(2) Tanpa menjejaskan keluasan subseksyen (1), Suruhanjaya boleh—

- (a) menasihati Kerajaan mengenai menambah baik kesejahteraan dan kebajikan anggota pasukan polis;
- (b) membantu Kerajaan dalam membentuk perundangan, atau mengesyorkan langkah pentadbiran kepada Kerajaan atau pasukan polis, demi menggalakkan integriti dan menghapuskan salah laku;
- (c) mengadakan pengauditan dan pemantauan mengenai aspek tertentu kemudahan, logistik, operasi dan tatacara operasi standard polis;
- (d) membuat lawatan ke mana-mana tempat dan premis seperti balai polis, rumah kakitangan polis, lokap dan pusat tahanan dan membuat apa-apa syor yang perlu;
- (e) mengkaji dan menentusahkan apa-apa pelanggaran tatacara operasi standard polis dan membuat apa-apa syor yang perlu;

- (f) menerima dan menilai apa-apa aduan salah laku daripada mana-mana orang terhadap mana-mana anggota pasukan polis dan menyiasat aduan itu; dan
- (g) mengumpul dan memproses maklumat dan keterangan yang berhubungan dengan apa-apa penyiasatan di bawah Akta ini dan boleh mengambil apa-apa langkah yang sah dan melakukan apa-apa perbuatan yang sah sebagaimana perlu yang berkaitan dengannya.

Anggota Suruhanjaya

6. (1) Yang di-Pertuan Agong hendaklah, atas nasihat Perdana Menteri, melantik tidak lebih daripada sepuluh anggota Suruhanjaya, yang daripadanya hendaklah ada seorang Pengerusi dan seorang Timbalan Pengerusi, bagi apa-apa tempoh dan atas apa-apa terma yang dinyatakan dalam surat cara pelantikan.

(2) Tiada seorang pun boleh dilantik sebagai anggota Suruhanjaya jika dia ialah atau pernah menjadi seorang anggota pasukan polis atau dia ialah seorang anggota perkhidmatan awam.

Tempoh jawatan

7. (1) Tertakluk kepada subseksyen (2), seseorang anggota Suruhanjaya memegang jawatan selama tempoh tidak melebihi tiga tahun sebagaimana yang dinyatakan dalam surat cara pelantikannya, dan dia layak untuk dilantik semula.

(2) Seseorang tidak boleh memegang jawatan anggota Suruhanjaya melebihi dua penggal yang berturut-turut.

(3) Seseorang anggota Suruhanjaya boleh pada bila-bila masa meletakkan jawatannya dengan surat yang ditujukan kepada Yang di-Pertuan Agong.

(4) Pelantikan seseorang anggota Suruhanjaya boleh pada bila-bila masa dibatalkan oleh Yang di-Pertuan Agong.

Saraan

8. Seseorang anggota Suruhanjaya hendaklah dibayar apa-apa saraan dan elaun yang ditentukan oleh Yang di-Pertuan Agong.

Pengosongan jawatan

9. Jawatan seseorang anggota Suruhanjaya hendaklah menjadi kosong jika—

- (a) dia mati;
- (b) telah dibuktikan terhadapnya, atau dia telah disabitkan atas, suatu pertuduhan yang berkenaan dengan—
 - (i) kesalahan yang melibatkan fraud, kecurangan atau keburukan akhlak;
 - (ii) kesalahan di bawah mana-mana undang-undang yang berhubungan dengan rasuah; atau
 - (iii) apa-apa kesalahan lain yang boleh dihukum dengan pemenjaraan atau denda tidak melebihi dua ribu ringgit;
- (c) dia menjadi bankrap;
- (d) dia tidak sempurna akal atau selainnya tidak berupaya menunaikan kewajipannya;
- (e) dia tidak menghadiri mesyuarat Suruhanjaya tiga kali berturut-turut tanpa kebenaran Suruhanjaya;
- (f) dia dipilih atau dilantik sebagai ahli Parlimen atau Dewan Undangan Negeri mana-mana Negeri;
- (g) peletakan jawatannya telah diterima oleh Yang di-Pertuan Agong;
- (h) pelantikannya telah dibatalkan oleh Yang di-Pertuan Agong; atau
- (i) tempoh pelantikannya telah tamat.

Mesyuarat

10. (1) Suruhanjaya hendaklah bermesyuarat sekurang-kurangnya dua kali sebulan atau seberapa kerap yang perlu untuk melaksanakan fungsinya.

(2) Pengerusi Suruhanjaya hendaklah mempengerusikan semua mesyuarat Suruhanjaya.

(3) Kuorum Suruhanjaya ialah lima orang.

(4) Tiap-tiap anggota Suruhanjaya yang hadir berhak mendapat satu undi dan jika mengenai sesuatu persoalan untuk ditentukan oleh Suruhanjaya terdapat bilangan undi yang sama banyak, Pengerusi hendaklah mempunyai undi pemutus.

(5) Suruhanjaya hendaklah menentukan penjalanan prosidingnya sendiri.

(6) Suruhanjaya hendaklah menyebabkan minit semua mesyuaratnya disenggarakan dan disimpan dalam bentuk yang sepatutnya.

(7) Suruhanjaya boleh mengundang mana-mana orang atau mana-mana wakil daripada pasukan polis untuk menghadiri mesyuarat bagi maksud menasihati Suruhanjaya tentang apa-apa perkara yang dibincangkan tetapi orang itu tidak berhak mengundi dalam mesyuarat itu atau hadir semasa sesuatu keputusan dibuat.

Penjalanan sementara fungsi Pengerusi

11. Walau apa pun subseksyen 10(2), jika Pengerusi tidak dapat melaksanakan fungsinya kerana apa-apa sebab, atau dalam apa-apa tempoh kekosongan jawatan Pengerusi, Timbalan Pengerusi, atau jika dia tidak ada, mana-mana anggota Suruhanjaya yang dilantik oleh anggota Suruhanjaya yang lain, hendaklah melaksanakan fungsi Pengerusi.

Penzahiran kepentingan

12. Seseorang anggota Suruhanjaya yang, sama ada secara langsung atau tidak langsung, mempunyai sendiri, melalui anggota keluarganya atau sekutunya, apa-apa kepentingan mengenai apa-apa perkara yang dibincangkan oleh Suruhanjaya

atau mengenai apa-apa prosiding untuk menangani salah laku di hadapan Suruhanjaya, hendaklah menzahirkan hakikat dan jenis kepentingannya dan penzahiran sedemikian hendaklah direkodkan dalam minit atau nota prosiding untuk menangani salah laku itu dan anggota Suruhanjaya itu hendaklah mengundur diri daripada mengambil bahagian dalam apa-apa perbincangan mengenai, prosiding untuk menangani, atau semasa Suruhanjaya membuat apa-apa keputusan berhubung dengan, salah laku itu.

Pewakilan fungsi dan kuasa Suruhanjaya

13. (1) Suruhanjaya boleh, mewakilan fungsi dan kuasanya kepada—

- (a) mana-mana anggota Suruhanjaya;
- (b) mana-mana Jawatankuasa; atau
- (c) mana-mana anggota pasukan polis.

(2) Anggota Suruhanjaya, jawatankuasa atau anggota pasukan polis yang diwakilkan fungsi dan kuasa di bawah subseksyen (1) hendaklah terikat kepada pematuhan dan memberikan perhatian kepada semua syarat dan sekatan yang dikenakan oleh Suruhanjaya dan semua keperluan, tatacara dan perkara yang dinyatakan oleh Suruhanjaya berhubung dengan pewakilan kuasa itu.

(3) Apa-apa fungsi dan kuasa yang diwakilkan di bawah seksyen ini hendaklah dijalankan atas nama dan bagi pihak Suruhanjaya.

(4) Pewakilan kuasa di bawah seksyen ini tidak akan menghalang Suruhanjaya daripada menjalankan sendiri fungsi dan kuasa yang telah diwakilkan itu pada bila-bila masa.

BAHAGIAN III

PENTADBIRAN

Setiausaha

14. (1) Suruhanjaya hendaklah mempunyai seorang Setiausaha yang hendaklah menjadi ketua pegawai eksekutif Suruhanjaya.

(2) Setiausaha hendaklah dilantik oleh Suruhanjaya yang hendaklah menjadi pegawai Suruhanjaya.

(3) Setiausaha hendaklah dilantik atas apa-apa terma dan hendaklah mempunyai apa-apa fungsi yang ditentukan oleh Suruhanjaya.

Penjalanan sementara fungsi Setiausaha

15. Suruhanjaya boleh melantik mana-mana pegawai Suruhanjaya untuk bertindak buat sementara waktu sebagai Setiausaha selama tempoh semasa—

(a) jawatan Setiausaha kosong;

(b) Setiausaha tidak hadir bertugas atau tidak berada di Malaysia; atau

(c) Setiausaha, kerana apa-apa sebab lain, tidak dapat melaksanakan kewajipan jawatannya.

Pegawai

16. (1) Hendaklah dilantik apa-apa bilangan pegawai Suruhanjaya yang perlu untuk membantu Suruhanjaya menunaikan fungsinya dan menjalankan kuasanya dengan berkesan dan efisien dan bagi maksud melaksanakan peruntukan Akta ini.

(2) Suruhanjaya boleh melantik mana-mana pegawai daripada mana-mana agensi kerajaan atas dasar peminjaman sebagai penyiasatnya.

(3) Suruhanjaya boleh melantik apa-apa bilangan pegawai undang-undang yang perlu yang hendaklah dipinjam daripada kalangan pegawai Perkhidmatan Kehakiman dan Perundangan atau dilantik daripada kalangan peguam bela dan peguam cara untuk membantu Suruhanjaya.

(4) Seseorang pegawai Suruhanjaya yang, secara langsung atau tidak langsung, mempunyai sendiri, melalui anggota keluarganya atau sekutunya, apa-apa kepentingan mengenai atau kaitan dengan anggota pasukan polis yang sedang disiasat oleh Suruhanjaya hendaklah menzahirkan kepentingan atau kaitannya dengan serta-merta kepada Pengerusi dan tidak boleh terlibat dalam apa-apa penyiasatan yang dijalankan oleh Suruhanjaya berkenaan dengan anggota pasukan polis itu.

Perunding

17. (1) Suruhanjaya boleh mengambil khidmat orang, termasuk pesara dan bekas anggota pasukan polis, atas apa-apa terma yang boleh dikenakan oleh Suruhanjaya, sebagai perunding atau untuk melaksanakan apa-apa perkhidmatan yang difikirkan sesuai oleh Suruhanjaya.

(2) Seseorang yang diambil khidmat di bawah subseksyen (1) yang, secara langsung atau tidak langsung, mempunyai sendiri, melalui anggota keluarganya atau sekutunya, apa-apa kepentingan mengenai atau kaitan dengan seseorang anggota pasukan polis yang sedang disiasat oleh Suruhanjaya hendaklah menzahirkan kepentingan atau kaitannya dengan serta-merta kepada anggota Suruhanjaya dan tidak boleh terlibat dalam apa-apa penyiasatan yang dijalankan oleh Suruhanjaya berkenaan dengan anggota pasukan polis itu.

Jawatankuasa

18. (1) Suruhanjaya boleh menubuhkan apa-apa jawatankuasa untuk membantu Suruhanjaya melaksanakan fungsinya di bawah Akta ini.

(2) Suruhanjaya boleh melantik mana-mana anggotanya untuk menjadi pengerusi suatu jawatankuasa.

(3) Suruhanjaya boleh melantik mana-mana anggota atau pegawai Suruhanjaya untuk menganggotai mana-mana jawatankuasa.

(4) Jawatankuasa hendaklah tertakluk dan bertindak mengikut arahan yang diberikan kepada jawatankuasa oleh Suruhanjaya.

(5) Suruhanjaya boleh pada bila-bila masa memberhentikan atau meminda keanggotaan jawatankuasa.

(6) Anggota jawatankuasa hendaklah dibayar apa-apa elaun yang ditentukan oleh Perdana Menteri.

Kad kuasa

19. (1) Bagi maksud Akta ini, suatu kad kuasa hendaklah dikeluarkan kepada seorang anggota dan pegawai Suruhanjaya.

(2) Kad kuasa hendaklah ditandatangani oleh Pengerusi Suruhanjaya dan kad kuasa itu hendaklah menjadi keterangan *prima facie* tentang pelantikan di bawah Akta ini.

(3) Seorang anggota atau pegawai Suruhanjaya yang bertindak di bawah Akta ini hendaklah, apabila diminta, mengisytiharkan jawatannya dan menunjukkan kepada orang yang terhadapnya dia bertindak atau orang yang daripadanya dia meminta apa-apa maklumat, kad kuasa yang dikeluarkan kepadanya.

Penggunaan kakitangan atau kemudahan jabatan kerajaan, dsb.

20. (1) Suruhanjaya boleh membuat permintaan dan perkiraan bagi penggunaan perkhidmatan—

(a) mana-mana kakitangan atau kemudahan sesuatu jabatan kerajaan atau pihak berkuasa tempatan atau berkanun; atau

(b) mana-mana pegawai kerajaan termasuklah anggota pasukan polis untuk bekerjasama dengan, atau membantu dalam penjalanan kewajipannya, atau untuk membantu Suruhanjaya dalam pelaksanaan fungsinya di bawah Akta ini.

(2) Jabatan kerajaan atau pihak berkuasa tempatan atau badan berkanun atau pegawai kerajaan yang disebut dalam subseksyen (1) adalah berkewajipan untuk memenuhi permintaan di bawah seksyen ini.

Kerjasama dengan agensi lain

21. (1) Suruhanjaya boleh, dalam menjalankan fungsinya, bekerjasama dengan mana-mana agensi penguatkuasaan, mana-mana jabatan kerajaan Persekutuan atau Negeri atau mana-mana orang atau badan, yang difikirkan sesuai oleh Suruhanjaya.

(2) Suruhanjaya boleh berunding dengan dan menyebarkan maklumat kepada, mana-mana agensi penguatkuasaan, mana-mana jabatan kerajaan Persekutuan atau Negeri atau mana-mana orang atau badan yang difikirkan sesuai oleh Suruhanjaya.

(3) Apa-apa maklumat yang disebarikan di bawah seksyen ini hendaklah disifatkan sebagai rahsia, dan mana-mana orang atau badan yang menerima maklumat itu adalah tertakluk kepada peruntukan kerahsiaan di bawah seksyen 44 berhubung dengan maklumat itu.

BAHAGIAN IV**ADUAN SALAH LAKU****Skop salah laku**

22. (1) Suruhanjaya boleh menerima aduan, atau menguruskan aduan terhadap mana-mana anggota pasukan polis yang dirujuk kepadanya, mengenai salah laku yang berikut:

- (a) apa-apa tindakan yang diambil atau tidak diambil yang berlawanan dengan mana-mana undang-undang bertulis;
- (b) ketidakpatuhan kepada kaedah-kaedah dan tatacara operasi standard polis;
- (c) apa-apa tindakan yang diambil atau tidak diambil yang tidak munasabah, tidak adil, menindas atau berdiskriminasi secara tidak wajar;

- (d) apa-apa tindakan yang diambil atau tidak diambil yang dilakukan atas motif yang tidak wajar, alasan yang tidak berkaitan atau pertimbangan yang tidak berkaitan;
- (e) kegagalan untuk menyediakan alasan dalam hal yang alasan perlu disediakan; dan
- (f) pelakuan apa-apa kesalahan jenayah oleh anggota pasukan polis.

(2) Walau apa-apapun subseksyen (1), salah laku hendaklah tidak termasuk apa-apa perbuatan yang dikawal selia di bawah seksyen 96 dan 97 Akta Polis 1967 [*Akta 344*].

Jawatankuasa Aduan

23. Suruhanjaya hendaklah menubuhkan suatu Jawatankuasa Aduan yang dianggotai oleh apa-apa bilangan pegawai Suruhanjaya.

Aduan terhadap pasukan polis

24. (1) Apa-apa aduan yang dibuat oleh mana-mana orang terhadap pasukan polis atau anggota pasukan polis hendaklah dibuat secara bertulis dan ditujukan kepada Jawatankuasa Aduan.

(2) Jika aduan terhadap pasukan polis atau anggota pasukan polis yang dibuat oleh mana-mana orang secara terus kepada Ketua Jabatan, Ketua Jabatan hendaklah dengan serta-merta merujuk aduan salah laku itu kepada Jawatankuasa Aduan.

(3) Jawatankuasa Aduan hendaklah menimbang teliti aduan yang diterima dan memutuskan pengelasan aduan itu sebagaimana yang dinyatakan dalam seksyen 25.

(4) Dalam seksyen ini, “Ketua Jabatan” ertinya anggota pasukan polis yang dipertanggungkan dengan kawalan sebagaimana yang diperuntukkan dalam seksyen 6 Akta Polis 1967.

Pengelasan aduan

25. Pengelasan aduan adalah seperti yang berikut:

- (a) jika aduan melibatkan apa-apa kesalahan di bawah Bahagian IV Akta Suruhanjaya Pencegahan Rasuah Malaysia 2009 [*Akta 694*], aduan itu hendaklah dirujuk kepada Suruhanjaya Pencegahan Rasuah Malaysia;
- (b) jika aduan melibatkan apa-apa kesalahan jenayah di bawah apa-apa undang-undang bertulis, aduan hendaklah dirujuk kepada pihak berkuasa yang berkenaan;
- (c) jika aduan melibatkan apa-apa salah laku yang disebut dalam seksyen 22, aduan itu hendaklah dirujuk kepada mana-mana pegawai Suruhanjaya bagi penyiasatan; dan
- (d) jika—
 - (i) aduan itu bersifat remeh, menyusahkan atau tidak dibuat dengan suci hati atau hal perkara aduan itu kecil;
 - (ii) salah laku yang diadukan telah berlaku terlalu lama dahulu untuk mewajarkan suatu penyiasatan dijalankan;
 - (iii) terdapat atau telah tersedia suatu cara tebus rugi alternatif dan memuaskan bagi pengadu;
 - (iv) hal perkara aduan itu telah diputuskan secara muktamad oleh mana-mana mahkamah atau menjadi hal perkara apa-apa prosiding yang belum selesai di mana-mana mahkamah, termasuklah apa-apa prosiding rayuan; atau
 - (v) aduan ialah aduan berulang dan tidak mengandungi tohmahan yang baru yang akan memberi kesan terhadap perihal aduan,

Jawatankuasa Aduan hendaklah mengesyorkan kepada Suruhanjaya untuk menolak aduan.

BAHAGIAN V

KUASA PENYIASATAN

Kuasa untuk memeriksa orang

26. (1) Seseorang pegawai Suruhanjaya boleh, dalam menjalankan penyiasatan di bawah Akta ini, melalui notis bertulis—

(a) memerintahkan mana-mana anggota pasukan polis atau mana-mana pegawai badan awam atau mana-mana orang untuk hadir di hadapannya bagi maksud diperiksa secara lisan berhubung dengan apa-apa perkara yang mungkin dapat, pada pendapatnya, membantu dalam penyiasatan itu; atau

(b) memerintahkan mana-mana anggota pasukan polis atau mana-mana pegawai badan awam atau mana-mana orang supaya memberikan pernyataan bertulis yang dibuat dengan bersumpah atau berikrar yang menyatakan dalamnya segala maklumat yang dikehendaki di bawah notis itu, iaitu maklumat yang, pada pendapat pegawai Suruhanjaya itu, akan dapat membantu dalam penyiasatan itu, dalam tempoh yang dinyatakan oleh pegawai Suruhanjaya itu.

(2) Seseorang yang telah diberikan suatu notis bertulis di bawah perenggan (1)(a) hendaklah—

(a) hadir mengikut terma notis itu untuk diperiksa, dan hendaklah terus hadir dari hari ke hari jika diarahkan sedemikian sehingga pemeriksaan itu selesai; dan

(b) semasa pemeriksaan itu, menzahirkan semua maklumat yang diketahuinya, atau yang tersedia untuknya, berkenaan dengan perkara yang berhubungan dengannya dia diperiksa, dan menjawab dengan benar dan setakat yang dia tahu dan percaya adalah benar.

(3) Seseorang pegawai Suruhanjaya yang memeriksa seseorang di bawah perenggan (1)(a) hendaklah merekodkan secara bertulis apa-apa pernyataan yang dibuat oleh orang itu dan pernyataan yang direkodkan sedemikian hendaklah dibacakan kepada dan ditandatangani oleh orang itu, dan jika orang itu enggan

menandatangani rekod itu, pegawai itu hendaklah mencatatkan pada rekod itu yang rekod itu ditandatangani oleh pegawai itu hakikat keengganan itu dan sebab-sebabnya, jika ada, yang dinyatakan oleh orang yang diperiksa itu.

(4) Mana-mana orang yang melanggar seksyen ini melakukan suatu kesalahan dan boleh, apabila disabitkan, didenda tidak melebihi sepuluh ribu ringgit atau dipenjarakan tidak melebihi dua tahun atau kedua-duanya.

Kuasa untuk memperoleh dokumen atau benda lain

27. (1) Bagi maksud penyiasatan di bawah Akta ini, Suruhanjaya boleh, melalui notis bertulis yang disampaikan kepada mana-mana anggota pasukan polis atau mana-mana pegawai badan awam atau mana-mana orang mengkehendaki anggota pasukan polis atau pegawai badan awam atau orang itu untuk mengemukakan dokumen atau benda lain yang berkaitan dengan siasatan itu atau yang pada pendapat Suruhanjaya adalah relevan.

(2) Notis di bawah seksyen ini—

(a) hendaklah menyatakan dan memperihalkan dokumen atau benda lain yang berkenaan; dan

(b) hendaklah menetapkan masa dan tarikh untuk mematuhi notis itu.

(3) Notis itu boleh memperuntukkan bahawa syarat itu bolehlah dipatuhi oleh orang lain yang bertindak bagi pihak anggota pasukan polis atau pegawai badan awam atau orang itu, dan boleh, tetapi tidak semestinya, menyatakan orang atau golongan orang yang boleh bertindak sedemikian.

(4) Mana-mana orang yang telah diserahkan notis di bawah seksyen ini—

(a) yang tidak mematuhi notis tersebut; atau

(b) yang memberikan apa-apa maklumat yang diketahuinya adalah palsu atau mengelirukan dalam butir-butir yang material,

melakukan suatu kesalahan dan boleh, apabila disabitkan, didenda tidak melebihi sepuluh ribu ringgit atau dipenjarakan tidak melebihi dua tahun atau kedua-duanya sekali.

Dapatan penyiasatan

28. (1) Pegawai Suruhanjaya hendaklah, setelah selesai siasatan, menyerahkan dapatannya kepada Jawatankuasa Aduan.

(2) Jawatankuasa Aduan boleh, selepas menimbangkan dapatan pegawai Suruhanjaya melakukan tindakan yang berikut:

- (a) jika dapatan menzahirkan apa-apa kesalahan di bawah Bahagian IV Akta Suruhanjaya Pencegahan Rasuah Malaysia 2009, merujukkan dapatan itu kepada Suruhanjaya Pencegahan Rasuah Malaysia;
- (b) jika dapatan menzahirkan apa-apa kesalahan jenayah, merujukkan dapatan itu kepada pihak berkuasa yang berkaitan;
- (c) jika dapatan salah laku dizahirkan, merujukkan dapatan salah laku itu kepada Suruhanjaya bagi maksud memulakan prosiding bagi menangani salah laku itu di bawah Bahagian VI; dan
- (d) jika dapatan menzahirkan tiada salah laku, merekodkan dapatan itu.

(3) Jawatankuasa Aduan hendaklah memaklumkan kepada pengadu tentang tindakan yang telah diambil ke atas aduan itu.

Pasukan Petugas

29. (1) Suruhanjaya boleh menubuhkan apa-apa bilangan Pasukan Petugas untuk membantu Suruhanjaya menyiasat salah laku di bawah Akta ini.

(2) Anggota Pasukan Petugas boleh terdiri daripada pegawai Suruhanjaya dan perunding yang diambil khidmat di bawah seksyen 17.

(3) Bagi maksud menyasat apa-apa insiden di bawah seksyen 47, anggota Pasukan Petugas hendaklah mempunyai semua kuasa penyiasatan sebagaimana yang terkandung dalam Kanun Tatacara Jenayah [Akta 593] dan kuasa sedemikian hendaklah sebagai tambahan kepada kuasa yang diperuntukkan di bawah Akta ini dan tidak mengurangkan kuasanya di bawah Akta ini.

Suruhanjaya boleh memulakan penyiasatan

30. (1) Tanpa menjejaskan apa-apa yang berlawanan dalam Akta ini, Suruhanjaya boleh memulakan sesuatu penyiasatan atas inisiatifnya sendiri tetapi hanya jika Suruhanjaya berpuas hati bahawa hal perkara itu mempunyai kepentingan yang signifikan kepada orang ramai atau bahawa adalah demi kepentingan awam untuk berbuat sedemikian sama ada atau tidak terdapat aduan salah laku berhubung dengannya.

(2) Penyiasatan yang disebut dalam subseksyen (1) hendaklah dijalankan mengikut Bahagian V Akta ini.

BAHAGIAN VI

PROSIDING UNTUK MENANGANI SALAH LAKU

Kuasa tatatertib

31. (1) Suruhanjaya hendaklah mempunyai kuasa tatatertib ke atas apa-apa salah laku yang dilakukan oleh mana-mana anggota pasukan polis.

(2) Suruhanjaya boleh menjalankan bidang kuasa tatatertib ke atas apa-apa aduan berkenaan dengan salah laku mana-mana anggota pasukan polis.

(3) Suruhanjaya hendaklah menubuhkan Lembaga Tatatertib yang mempunyai bidang kuasa, dan terdiri daripada anggota, sebagaimana yang dinyatakan dalam Jadual.

(4) Walau apa pun subseksyen (3), jika aduan salah laku itu adalah terhadap Ketua Polis Negara, Ketua Setiausaha Negara hendaklah menubuhkan suatu Lembaga Tatatertib Khas untuk mendengar aduan itu dan prosiding di hadapan Lembaga Tatatertib Khas itu hendaklah dijalankan mengikut peraturan-peraturan yang dibuat di bawah Perkara 132 Perlembagaan Persekutuan.

Prosiding untuk menangani salah laku

32. (1) Lembaga Tatatertib boleh, apabila menimbang dapatan di bawah seksyen 28 dan apabila selesai menyelesaikan siasatan di bawah seksyen 30, memulakan prosiding menangani salah laku.

(2) Prosiding untuk menangani salah laku hendaklah dijalankan mengikut peraturan-peraturan yang dibuat di bawah Akta ini.

(3) Lembaga Tatatertib hendaklah menyelesaikan prosiding untuk menangani salah laku ini dengan cara sebagaimana yang Suruhanjaya berpendapat paling sesuai bagi penyelesaian yang adil dan cepat.

Hukuman salah laku

33. (1) Lembaga Tatatertib boleh, dalam menjalankan kuasa tatatertibnya, mengenakan mana-mana satu atau lebih hukuman yang berikut:

- (a) amaran;
- (b) denda;
- (c) lucut hak emolumen;
- (d) tangguh pergerakan gaji;
- (e) turun gaji;
- (f) turun pangkat; atau
- (g) buang kerja.

(2) Pengenaan hukuman yang dinyatakan di bawah subseksyen (1) hendaklah dibuat mengikut peraturan-peraturan yang dibuat di bawah Akta ini.

BAHAGIAN VII

KESALAHAN

Ugutan terhadap orang yang memberikan keterangan

34. (1) Seseorang yang menghalang atau cuba menghalang mana-mana orang daripada memberikan keterangan di hadapan Suruhanjaya atau melalui ugutan, menyekat atau cuba menyekat mana-mana orang daripada memberikan keterangan sedemikian, melakukan suatu kesalahan dan boleh, apabila disabitkan, didenda tidak melebihi sepuluh ribu ringgit atau dipenjarakan selama tempoh tidak melebihi dua tahun atau kedua-duanya.

(2) Seseorang yang mengugut, mengeji atau mencederakan mana-mana orang kerana telah memberikan keterangan, atau kerana keterangan yang telah diberikan oleh orang itu di hadapan Suruhanjaya, melakukan suatu kesalahan dan boleh, apabila disabitkan, didenda tidak melebihi sepuluh ribu ringgit atau dipenjarakan selama tempoh tidak melebihi dua tahun atau kedua-duanya.

Penghinaan

35. (1) Seseorang yang melakukan perbuatan menghina terhadap seseorang anggota Suruhanjaya melakukan suatu kesalahan dan hendaklah, apabila disabitkan, boleh didenda tidak melebihi sepuluh ribu ringgit atau dipenjarakan selama tempoh tidak melebihi dua tahun atau kedua-duanya.

(2) Bagi maksud seksyen ini, suatu “perbuatan menghina” ertinya—

- (a) apa-apa perbuatan tidak hormat atau apa-apa kejian atau ugutan terhadap seseorang anggota Suruhanjaya pada bila-bila masa dan mana-mana tempat lain kerana dia menjalankan sifatnya sebagai seorang anggota Suruhanjaya; atau
- (b) apa-apa perbuatan selain yang diperuntukkan dalam perenggan (a), jika Suruhanjaya merupakan Mahkamah yang mempunyai kuasa untuk mensabitkan, penghinaan, perbuatan itu adalah penghinaan Mahkamah itu.

BAHAGIAN VIII

PELBAGAI

Surcaj

36. (1) Suruhanjaya boleh mengenakan surcaj terhadap mana-mana anggota pasukan polis mengikut Akta Tatacara Kewangan 1957 [Akta 61].

(2) Tiap-tiap pengenaan surcaj di bawah subseksyen (1) hendaklah direkodkan dalam buku perkhidmatan anggota pasukan polis itu.

Pembekalan maklumat

37. (1) Suruhanjaya boleh mengumpul dan membekalkan kepada pasukan polis atau mana-mana pihak berkuasa yang berkenaan apa-apa maklumat statistik atau apa-apa maklumat umum yang lain yang pada pendapat Suruhanjaya adalah perlu dibawa kepada perhatian pasukan polis atau mana-mana pihak berkuasa yang berkenaan berhubung dengan fungsi Suruhanjaya di bawah seksyen 4 dan kuasa Suruhanjaya di bawah seksyen 5 untuk membolehkan pasukan polis atau pihak berkuasa yang berkenaan melaksanakan fungsi di bawah mana-mana undang-undang bertulis yang berkaitan.

(2) Suruhanjaya boleh meminta daripada pasukan polis atau mana-mana pihak berkuasa yang berkenaan apa-apa maklumat statistik atau apa-apa maklumat umum berkaitan dengan fungsi Suruhanjaya di bawah seksyen 4 dan kuasa Suruhanjaya di bawah seksyen 5.

(3) Pasukan polis atau mana-mana pihak berkuasa yang berkenaan hendaklah memaklumkan kepada Suruhanjaya mengenai tindakan yang diambil yang timbul daripada pembekalan maklumat oleh Suruhanjaya di bawah subseksyen (1) dalam tempoh empat belas hari dari tarikh penerimaan maklumat itu dari Suruhanjaya.

Perlindungan daripada liabiliti

38. (1) Tiada apa-apa tindakan, guaman, pendakwaan atau prosiding boleh dimulakan di dalam mana-mana mahkamah terhadap Suruhanjaya, mana-mana anggota Suruhanjaya atau mana-mana pegawai Suruhanjaya berkenaan dengan apa-apa

perbuatan atau benda yang dilakukan atau dibuat oleh atau bagi pihak Suruhanjaya, mana-mana anggota Suruhanjaya atau mana-mana anggota Suruhanjaya atas sifat sedemikian dengan syarat bahawa pada masa itu Suruhanjaya, mana-mana anggota Suruhanjaya atau mana-mana pegawai Suruhanjaya telah menjalankan fungsinya dengan suci hati.

(2) Seorang peguam bela dan peguam cara yang membantu Suruhanjaya atau wakil seseorang di hadapan Suruhanjaya mempunyai perlindungan dan kekebalan yang sama seperti halnya seorang peguam bela dan peguam cara yang hadir untuk satu pihak dalam prosiding dalam Mahkamah.

(3) Tertakluk kepada Akta ini, seseorang yang disaman untuk hadir atau yang hadir di hadapan Suruhanjaya sebagai seorang saksi, atau untuk mengemukakan suatu dokumen atau benda lain kepada Suruhanjaya, mempunyai perlindungan yang sama sebagai seorang saksi dalam prosiding dalam Mahkamah.

(4) Tiada liabiliti jenayah atau sivil selain Akta ini yang berhubung kait dengan seseorang kerana kepatuhan, atau yang berupa kepatuhan atas dasar suci hati, kepada apa-apa syarat yang dibuat di bawah Akta ini; khususnya, jika seseorang memberi apa-apa rekod pemeriksaan atau pernyataan bersumpah atau pengesahan secara bertulis atau mengemukakan apa-apa dokumen atau benda lain di bawah Akta ini, tiada liabiliti sivil yang boleh dikenakan pada orang itu kerana berbuat demikian, sama ada liabiliti itu akan timbul di bawah suatu kontrak atau selainnya.

(5) Tiada keterangan, dokumen atau dapatan Suruhanjaya di bawah Akta ini boleh diterima dalam apa-apa prosiding sivil atau jenayah terhadap orang yang memberi keterangan jika orang itu membantah untuk memberi apa-apa rekod pemeriksaan atau pernyataan sumpah atau pengesahan secara bertulis atau mengemukakan apa-apa dokumen atau perkara lain.

Penguntukan wang tahunan

39. Parlimen hendaklah membuat penguntukan wang yang mencukupi secara tahunan bagi maksud Suruhanjaya untuk membolehkan Suruhanjaya menunaikan fungsi dan menjalankan kuasanya secara berkesan di bawah Akta ini.

Akta Badan Berkanun (Akaun dan Laporan Tahunan) 1980

40. Akta Badan Berkanun (Akaun dan Laporan Tahunan) 1980 [*Akta 240*] hendaklah terpakai bagi Suruhanjaya.

Laporan tahunan

41. (1) Suruhanjaya hendaklah, tidak lewat daripada mesyuarat kedua Parlimen bagi tahun yang berikutnya, mengemukakan suatu laporan tahunan untuk dibentangkan di Parlimen mengenai semua aktivitinya dalam tahun yang dimaksudkan dalam laporan itu.

(2) Laporan itu hendaklah mengandungi suatu senarai semua perkara yang dirujuk kepada Suruhanjaya dan tindakan yang telah diambil berkenaan dengannya.

Akta Perlindungan Pihak Berkuasa Awam 1948

42. Akta Perlindungan Pihak Berkuasa Awam 1948 [*Akta 198*] hendaklah terpakai bagi apa-apa tindakan, guaman, pendakwaan atau prosiding terhadap Suruhanjaya, mana-mana anggota Suruhanjaya atau pegawai Suruhanjaya berkenaan dengan apa-apa perbuatan atau benda yang dilakukan atau dibuat olehnya atas sifat sedemikian.

Pekhidmat awam

43. Tiap-tiap anggota Suruhanjaya atau pegawai Suruhanjaya semasa menunaikan kewajibannya sebagai anggota atau pegawai Suruhanjaya hendaklah disifatkan sebagai pekhidmat awam mengikut pengertian Kanun Keseksaan [*Akta 574*].

Obligasi kerahsiaan

44. (1) Kecuali bagi maksud Akta ini atau bagi maksud apa-apa prosiding sivil atau jenayah di bawah mana-mana undang-undang bertulis atau jika selainnya dibenarkan oleh Suruhanjaya—

(a) tiada anggota Suruhanjaya, pegawai suruhanjaya atau perunding, sama ada semasa atau selepas tempoh jawatan atau penggajian, boleh menzahirkan apa-apa maklumat yang didapatinya semasa menjalankan tugasnya; dan

(b) tiada orang lain yang dengan apa jua cara mempunyai akses kepada apa-apa maklumat atau dokumen yang berhubungan dengan hal ehwal Suruhanjaya boleh menzahirkan maklumat atau dokumen itu.

(2) Mana-mana orang yang melanggar subseksyen (1) melakukan suatu kesalahan dan boleh apabila disabitkan, boleh dikenakan denda tidak melebihi sepuluh ribu ringgit atau pemenjaraan selama tempoh tidak melebihi dua tahun atau kedua-duanya.

Pemulaan dan penjalanan pendakwaan

45. Tiada pendakwaan berkenaan dengan apa-apa kesalahan di bawah Akta ini boleh dimulakan kecuali oleh atau dengan keizinan bertulis Pendakwa Raya.

Perlindungan orang yang membantu Suruhanjaya

46. (1) Jika didapati oleh Suruhanjaya bahawa, kerana seseorang itu sedang membantu Suruhanjaya, keselamatan orang atau mana-mana orang lain boleh jadi terjejas atau orang itu atau mana-mana orang lain boleh ditakut-takutkan atau diganggu, Suruhanjaya boleh membuat perkiraan tertentu sebagaimana yang perlu—

(a) untuk melindungi keselamatan mana-mana orang sedemikian; atau

(b) untuk melindungi mana-mana orang sedemikian daripada ditakut-takutkan atau diganggu.

(2) Dalam seksyen ini, sebutan tentang seseorang yang sedang membantu Suruhanjaya adalah sebutan tentang seseorang yang—

(a) telah hadir, sedang hadir atau yang akan hadir di hadapan Suruhanjaya untuk memberikan keterangan atau untuk mengemukakan suatu dokumen atau benda lain; atau

(b) telah membantu, sedang membantu atau yang akan membantu dengan cara lain.

(3) Suruhanjaya boleh mengarahkan Ketua Polis Negara, suatu badan awam atau seorang pegawai badan itu—

- (a) untuk menyediakan apa-apa perlindungan yang disebut dalam subseksyen (1);
- (b) untuk menyediakan kakitangan atau kemudahan atau kedua-duanya sekali untuk membantu dalam menyediakan perlindungan itu; atau
- (c) untuk selainnya membantu dalam menyediakan perlindungan itu.

(4) Ketua Polis Negara, suatu badan awam atau pegawai badan itu berkewajipan untuk mematuhi apa-apa arahan setakat yang secara munasabahnya boleh.

(5) Apa-apa perkiraan yang dibuat di bawah subseksyen (1) boleh tetapi tidak semestinya melibatkan Suruhanjaya yang membuat perintah yang terpakai bagi orang tertentu dan perintah sedemikian tidak terhad kepada arahan daripada jenis yang disebut dalam subseksyen (3).

(6) Mana-mana orang yang melanggar suatu perintah yang dibuat di bawah subseksyen (5) melakukan suatu kesalahan dan boleh apabila disabitkan, dikenakan denda tidak melebihi sepuluh ribu ringgit atau pemenjaraan selama tempoh tidak melebihi dua tahun atau kedua-duanya.

Tanggungjawab untuk merujuk kes cedera parah atau kematian dalam jagaan

47. Pasukan polis hendaklah merujuk kepada Suruhanjaya apa-apa insiden yang mengakibatkan cedera parah atau kematian mana-mana orang dalam tahanan atau jagaan pasukan polis.

Pasukan polis hendaklah membekalkan maklumat

48. Pasukan polis hendaklah bekerjasama dengan dan membantu Suruhanjaya, termasuklah dalam membekalkan maklumat yang ada dalam kawalan atau boleh didapatkan oleh, pasukan yang diperlukan oleh Suruhanjaya dan mana-mana pegawai Suruhanjaya dalam pelaksanaan fungsi dan penjalanan kuasa Suruhanjaya di bawah Akta ini.

Kuasa meminda Jadual

49. Perdana Menteri boleh melalui perintah yang disiarkan dalam *Warta*, meminda Jadual.

Peraturan-peraturan

50. (1) Perdana Menteri boleh membuat peraturan-peraturan bagi maksud menjalankan atau melaksanakan peruntukan Akta ini.

(2) Tanpa menjejaskan keluasan subseksyen (1), peraturan-peraturan ini boleh menetapkan—

(a) tatacara pengurusan aduan;

(b) tatacara yang berhubungan dengan perjalanan prosiding tatatertib; dan

(c) apa-apa perkara lain yang ditetapkan di bawah Akta ini.

(3) Peraturan-peraturan yang dibuat di bawah seksyen ini boleh menetapkan apa-apa perbuatan yang berlawanan dengan peraturan-peraturan itu sebagai suatu kesalahan dan boleh menetapkan penalti denda tidak melebihi sepuluh ribu ringgit atau pemenjaraan selama tempoh tidak melebihi dua tahun atau kedua-duanya bagi kesalahan itu.

BAHAGIAN IX**PERUNTUKAN PEMANSUHAN, KECUALIAN DAN PERALIHAN****Pemansuhan dan pembubaran**

51. Akta Suruhanjaya Integriti Agensi Penguatkuasaan 2009 [*Akta 700*] (“Akta dimansuhkan”) dimansuhkan dan Suruhanjaya Integriti Agensi Penguatkuasaan (“Suruhanjaya dibubarkan”) adalah dibubarkan.

Pesuruhjaya Suruhanjaya dibubarkan

52. Walau apa pun apa-apa yang berlawanan, Pesuruhjaya Suruhanjaya dibubarkan dan anggota mana-mana jawatankuasa yang dilantik di bawah Akta dimansuhkan yang memegang jawatan sebelum permulaan kuat kuasa Akta ini hendaklah berhenti memegang jawatan pada tarikh itu.

Pemindahan kuasa, hak, dsb.

53. Segala kuasa, hak, kewajipan, liabiliti dan obligasi yang sebaik sebelum tarikh permulaan kuat kuasa Akta ini adalah kuasa, hak, kewajipan, liabiliti dan obligasi Suruhanjaya dibubarkan hendaklah, pada tarikh permulaan kuat kuasa Akta ini, diturunkan kepada Suruhanjaya.

Pemindahan wang dalam dana Suruhanjaya dibubarkan

54. Segala wang dalam atau yang kena dibayar ke dalam dana Suruhanjaya dibubarkan yang ditubuhkan di bawah Akta yang dimansuhkan hendaklah pada tarikh permulaan kuat kuasa Akta ini dipindahkan dan disifatkan menjadi sebahagian daripada wang Suruhanjaya di bawah seksyen 39 Akta ini.

Peletakhakan harta, dsb.

55. (1) Tertakluk kepada Akta ini, Perdana Menteri boleh, dari semasa ke semasa, melalui perintah yang disiarkan dalam *Warta*, menetapkan suatu tarikh peletakhakan dan pada tarikh itu semua harta, hak, kepentingan, obligasi dan liabiliti Suruhanjaya dibubarkan yang dinyatakan oleh Perdana Menteri dalam perintah itu hendaklah, menurut kuasa Akta ini, dipindahkan kepada dan terletak hak pada Suruhanjaya tanpa apa-apa pemindahhakan, penyerahhakan atau pemindahan.

(2) Tiap-tiap harta, hak, kepentingan, obligasi dan liabiliti yang dipindahkan kepada dan terletak hak pada Suruhanjaya dibubarkan hendaklah dipindahkan kepada dan terletak hak pada Suruhanjaya dengan hakmilik, estet atau kepentingan yang serupa dan dengan tempoh pemegangan yang serupa sebagaimana harta, hak, kepentingan, obligasi dan liabiliti itu terletak hak atau dipegang sebaik sebelum tarikh peletakhakan itu.

(3) Mana-mana tanah yang sebaik sebelum tarikh permulaan kuat kuasa Akta ini terletak hak pada Suruhanjaya dibubarkan hendaklah, pada tarikh peletakhakan, terletak hak pada Suruhanjaya bagi maksud Suruhanjaya.

(4) Jika menurut kuasa subseksyen (1), apa-apa harta dipindahkan kepada dan terletak hak pada Suruhanjaya dibubarkan, peruntukan Bahagian Tiga Puluh Kanun Tanah Negara 1965 [*Akta 56 Tahun 1965*] hendaklah, bagi maksud melaksanakan pendaftaran bagi peletakhakan itu, terpakai bagi Suruhanjaya.

(5) Mana-mana harta dan aset selain tanah yang sebaik sebelum tarikh permulaan kuat kuasa Akta ini terletak hak pada Suruhanjaya dibubarkan hendaklah, pada tarikh peletakhakan, terletak hak pada Suruhanjaya.

(6) Dalam hal hak, kepentingan, obligasi dan liabiliti yang berbangkit di bawah apa-apa pinjaman yang terletak hak pada Suruhanjaya dibubarkan pada tarikh peletakhakan, Suruhanjaya boleh membuat perjanjian atau perkiraan mengenai hak, kepentingan, obligasi dan liabiliti itu dengan mana-mana orang lain.

Kontrak yang sedia ada, dsb.

56. Segala surat ikatan, perjanjian, dokumen dan surat cara lain yang wujud sebaik sebelum tarikh permulaan kuat kuasa Akta ini dan menyentuh mana-mana harta atau wang yang dipindahkan di bawah Akta ini hendaklah terus berkuat kuasa dan berkesan sepenuhnya, terhadap atau memihak kepada Suruhanjaya, dan boleh dikuatkuasakan sepenuhnya dan dengan berkesannya seolah-olah, bukannya Suruhanjaya yang dibubarkan, tetapi Suruhanjaya yang telah dinamakan dalam surat ikatan, perjanjian, dokumen dan surat cara lain itu dan telah menjadi suatu pihak kepada surat ikatan, perjanjian, dokumen dan surat cara lain itu.

Pegawai dan staf Suruhanjaya dibubarkan disifatkan sebagai pegawai Suruhanjaya

57. Semua pegawai dan staf yang memegang pelantikan di bawah Akta yang dimansuhkan hendaklah disifatkan sebagai pegawai Suruhanjaya yang dilantik di bawah Akta ini dan hendaklah memegang suatu jawatan sebagaimana yang ditentukan oleh Suruhanjaya.

Aduan, dsb., agensi penguatkuasaan selain Polis Diraja Malaysia

58. Segala aduan, penyiasatan, dapatan dan pendengaran berhubung dengan agensi penguatkuasaan selain Polis Diraja Malaysia sebagaimana yang dinyatakan dalam Jadual Akta yang dimansuhkan hendaklah, pada tarikh kuat kuasa Akta ini, dirujuk kepada Pihak Berkuasa Tatatertib agensi penguatkuasaan masing-masing.

Penerusan aduan, dsb., salah laku polis

59. Perkara yang berikut hendaklah, pada permulaan kuat kuasa Akta ini, diuruskan di bawah Akta yang dimansuhkan seolah-olah Akta yang dimansuhkan tidak dimansuhkan, oleh Suruhanjaya dan hendaklah diselesaikan dalam tempoh enam bulan dari tarikh permulaan kuat kuasa Akta ini:

- (a) apa-apa aduan yang belum selesai di bawah seksyen 23 Akta yang dimansuhkan;
- (b) apa-apa siasatan yang belum selesai di bawah seksyen 25, subseksyen 27(4) dan seksyen 28 Akta yang dimansuhkan;
- (c) apa-apa dapatan Jawatankuasa Aduan yang belum selesai di bawah seksyen 26 Akta yang dimansuhkan dan dapatan Suruhanjaya di bawah seksyen 30 Akta yang dimansuhkan; atau
- (d) apa-apa pendengaran yang belum selesai di bawah seksyen 34 Akta yang dimansuhkan.

Penerusan prosiding tatatertib yang belum selesai berhubung dengan salah laku di hadapan Pihak Berkuasa Tatatertib polis

60. Segala prosiding disiplin yang berhubungan dengan salah laku di hadapan Pihak Berkuasa polis sebelum kuat kuasa Akta ini hendaklah diteruskan oleh Pihak berkuasa polis seolah-olah Akta ini tidak pernah diluluskan.

JADUAL

[Seksyen 31(3)]

| <i>Lembaga Tatatertib</i> | | |
|---------------------------------|--|---|
| <i>(1) Kategori pegawai</i> | <i>(2) Bidang kuasa</i> | <i>(3) Keanggotaan Lembaga Tatatertib</i> |
| Semua anggota pasukan polis | Semua tindakan tatatertib dengan tujuan buang kerja atau turun pangkat | <p>Pengerusi: Anggota Suruhanjaya</p> <p>Anggota: Dua orang anggota Suruhanjaya</p> <p>Ketua Polis Negara atau seorang wakil daripada pasukan polis yang berpangkat lebih tinggi daripada pegawai yang dituduh</p> <p>Seorang wakil Suruhanjaya Pasukan Polis (yang bukan dalam kalangan anggota pasukan polis)</p> |
| | Semua tindakan tatatertib bukan dengan tujuan buang kerja atau turun pangkat | <p>Pengerusi: Anggota Suruhanjaya</p> <p>Anggota: Dua orang anggota Suruhanjaya</p> <p>Ketua Polis Negara atau seorang wakil daripada pasukan polis yang berpangkat lebih tinggi daripada pegawai yang dituduh</p> <p>Seorang wakil Suruhanjaya Pasukan Polis (yang bukan dalam kalangan anggota pasukan polis)</p> |

HURAIAN

Rang Undang-Undang Suruhanjaya Bebas Aduan Salah Laku Polis 2019 (“Akta yang dicadangkan”) bertujuan untuk mengadakan peruntukan bagi Penubuhan Suruhanjaya Bebas Aduan Salah Laku Polis (“Suruhanjaya”). Matlamat Akta yang dicadangkan ialah untuk mempertingkatkan integriti pasukan polis, mengurangkan salah laku dalam kalangan anggota polis dan menggalakkan keyakinan orang ramai terhadap pasukan polis.

BAHAGIAN I

2. Bahagian I Akta yang dicadangkan memperkatakan perkara permulaan.

Fasal 1 mengandungi tajuk ringkas dan permulaan kuat kuasa Akta yang dicadangkan.

Fasal 2 pula mengandungi tafsiran bagi takrif dan ungkapan tertentu yang digunakan dalam Akta yang dicadangkan.

BAHAGIAN II

3. Bahagian II Akta yang dicadangkan ini memperkatakan penubuhan, fungsi dan kuasa Suruhanjaya.

Fasal 3 bertujuan untuk mengadakan peruntukan bagi penubuhan Suruhanjaya.

Fasal 4 dan *5* pula memperkatakan fungsi dan kuasa Suruhanjaya.

Fasal 6 bertujuan untuk mengadakan peruntukan bagi anggota Suruhanjaya.

Fasal 7 mengandungi peruntukan tentang tempoh jawatan anggota Suruhanjaya.

Fasal 8 memperuntukkan pembayaran saraan dan elaun kepada anggota Suruhanjaya.

Fasal 9 menyatakan hal keadaan yang baginya jawatan anggota Suruhanjaya menjadi kosong.

Fasal 10 mengandungi peruntukan tentang mesyuarat Suruhanjaya.

Fasal 11 menyatakan hal keadaan yang baginya Timbalan Pengerusi atau anggota Suruhanjaya lain boleh menjalankan fungsi Pengerusi.

Fasal 12 memperuntukkan bahawa anggota Suruhanjaya mestilah menzahirkan kepentingannya mengenai apa-apa perkara yang dibincangkan oleh Suruhanjaya atau dalam apa-apa prosiding di hadapan Suruhanjaya.

Fasal 13 menyatakan bahawa fungsi dan kuasa Suruhanjaya boleh dijalankan oleh seorang anggota Suruhanjaya, mana-mana jawatankuasa atau mana-mana anggota pasukan polis.

BAHAGIAN III

4. Bahagian III Akta yang dicadangkan memperkatakan pentadbiran Suruhanjaya.

Fasal 14 bertujuan memberi kuasa kepada Suruhanjaya untuk melantik seorang Setiausaha yang akan menjadi ketua pegawai eksekutif.

Fasal 15 menyatakan hal keadaan yang baginya Suruhanjaya boleh melantik mana-mana pegawai Suruhanjaya untuk menjalankan fungsi Setiausaha buat sementara waktu.

Fasal 16 bertujuan untuk memberi kuasa kepada Suruhanjaya untuk melantik mana-mana orang untuk menjadi pegawai Suruhanjaya.

Fasal 17 bertujuan untuk memberi kuasa kepada Suruhanjaya untuk mengambil khidmat perunding untuk membantu Suruhanjaya dalam melaksanakan fungsi dan kuasanya.

Fasal 18 bertujuan untuk membenarkan Suruhanjaya menubuhkan jawatankuasa untuk membantu Suruhanjaya.

Fasal 19 mengadakan peruntukan tentang pengeluaran kad kuasa kepada anggota Suruhanjaya dan pegawai Suruhanjaya.

Fasal 20 bertujuan untuk membenarkan Suruhanjaya membuat perkiraan dengan jabatan kerajaan atau pihak berkuasa tempatan atau badan berkanun yang lain untuk mengguna kakitangan atau kemudahan mereka dan membuat perkiraan dengan pasukan polis bagi mendapatkan bantuan anggota pasukan polis untuk bekerjasama atau membantu Suruhanjaya melaksanakan fungsinya.

Fasal 21 bertujuan untuk membenarkan Suruhanjaya untuk bekerjasama dengan mana-mana agensi penyiasatan dan penguatkuasaan undang-undang, institusi pendidikan dan orang lain untuk melaksanakan fungsinya.

BAHAGIAN IV

5. Bahagian IV Akta yang dicadangkan mengandungi peruntukan yang berhubungan dengan pengurusan aduan oleh Suruhanjaya.

Fasal 22 memperuntukkan bahawa Suruhanjaya boleh menerima aduan, atau menguruskan aduan yang dirujuk kepadanya berkenaan salah laku.

Subfasal 22(2) bertujuan untuk memperuntukkan bahawa salah laku tidak termasuk perbuatan yang dikawal selia di bawah seksyen 96 dan 97 Akta Polis 1967.

Fasal 23 memperuntukkan penubuhan Jawatankuasa Aduan.

Fasal 24 menyatakan cara untuk membuat aduan terhadap mana-mana anggota pasukan polis.

Fasal 25 bertujuan untuk mengadakan klasifikasi aduan.

BAHAGIAN V

6. Bahagian V Akta yang dicadangkan mengandungi peruntukan yang berhubungan dengan kuasa siasatan oleh Suruhanjaya dan pegawai Suruhanjaya.

Fasal 26 memperkatakan kuasa pegawai Suruhanjaya untuk mengeluarkan notis bertulis untuk mengarahkan mana-mana orang untuk hadir di hadapan pegawai itu untuk diperiksa secara lisan, atau untuk mengarahkan mana-mana orang untuk memberikan suatu pernyataan bersumpah bagi maksud siasatan pegawai itu.

Fasal 27 memperkatakan kuasa Suruhanjaya untuk mendapatkan dokumen atau benda lain daripada seseorang.

Fasal 28 menghendaki pegawai Suruhanjaya untuk menyerahkan dapatannya kepada Jawatankuasa Aduan. Jawatankuasa Aduan kemudian akan menentukan mana-mana yang berikut:

- (a) merujuk apa-apa dapatan salah laku kepada Lembaga Tatatertib;
- (b) merekod dapatan jika dapatan tidak mengesahkan perbuatan salah laku;
- (c) untuk merujuk apa-apa aduan salah laku yang diterima olehnya kepada Suruhanjaya Pencegahan Rasuah Malaysia jika kesalahan adalah di bawah Bahagian IV Akta Suruhanjaya Pencegahan Rasuah Malaysia 2009;
- (d) untuk merujuk kepada pihak berkuasa yang berkenaan apa-apa dapatan salah laku yang bersifat jenayah yang diterima atau dirujuk kepadanya.

Jawatankuasa Aduan hendaklah memaklumkan pengadu mana-mana tindakan di atas yang diambil.

Fasal 29 memperkatakan penubuhan Pasukan Petugas bagi maksud siasatan salah laku anggota pasukan polis.

Fasal 30 bertujuan untuk membolehkan Suruhanjaya memulakan penyiasatan salah laku atas inisiatifnya sendiri.

BAHAGIAN VI

7. Bahagian VI memperkatakan tatacara penjalanan prosiding untuk menangani salah laku.

Fasal 31 memperuntukkan bahawa Suruhanjaya hendaklah mempunyai kuasa kawalan tatatertib ke atas semua anggota pasukan polis. *Fasal* yang dicadangkan juga bertujuan untuk menubuhkan Lembaga Tatatertib. Jika aduan salah laku adalah terhadap Ketua Polis Negara, Ketua Setiausaha Negara hendaklah menubuhkan Lembaga Tatatertib Khas.

Fasal 32 memperuntukkan bahawa Lembaga Tatatertib hendaklah, selepas mempertimbangkan dapatan di bawah *fasal 28* dan selepas penyelesaian siasatan di bawah *fasal 30*, memulakan prosiding untuk menangani salah laku.

Fasal 33 menyatakan hukuman yang boleh dikenakan oleh Lembaga Tatatertib.

BAHAGIAN VII

8. Bahagian VII mengandungi peruntukan berkaitan dengan kesalahan.

Fasal 34 menjadikannya suatu kesalahan bagi orang yang mengugut, mengeji atau mencederakan, mana-mana orang yang memberikan keterangan di hadapan Suruhanjaya.

Fasal 35 memperkatakan perlakuan penghinaan terhadap anggota Suruhanjaya.

BAHAGIAN VIII

9. Bahagian VIII mengandungi peruntukan pelbagai.

Fasal 36 bertujuan untuk memberikan kuasa kepada Suruhanjaya untuk mengenakan surcaj ke atas mana-mana pegawai mengikut Akta Tatacara Kewangan 1957.

Fasal 37 memperuntukkan perkongsian apa-apa maklumat statistik antara Suruhanjaya dengan pasukan polis, mana-mana pihak berkuasa berkaitan berhubung dengan fungsi dan kuasa Suruhanjaya.

Fasal 38 memperuntukkan perlindungan bagi Suruhanjaya, anggota Suruhanjaya dan pegawai Suruhanjaya termasuk mana-mana orang yang bertindak di bawah arahan Suruhanjaya, atau seorang peguam bela dan peguam cara daripada sebarang tindakan, liabiliti, dakwaan atau tuntutan. Ia juga memperuntukkan tiada keterangan, dokumen atau dapatan Suruhanjaya boleh diterima dalam mana-mana tindakan sivil atau jenayah terhadap mana-mana orang yang memberikan keterangan itu.

Fasal 39 memperkatakan peruntukan kewangan Suruhanjaya.

Fasal 40 bertujuan untuk memperuntukkan bahawa Akta Badan Berkanun (Akaun dan Laporan Tahunan) 1980 hendaklah terpakai bagi Suruhanjaya.

Fasal 41 bertujuan untuk memperuntukkan bahawa Suruhanjaya dikehendaki mengemukakan dan membentangkan laporan tahunan di Parlimen.

Fasal 42 memperuntukkan bahawa Akta Perlindungan Pihak Berkuasa Awam 1948 hendaklah terpakai bagi Suruhanjaya dan pegawainya.

Fasal 43 memperuntukkan bahawa tiap-tiap anggota Suruhanjaya dan pegawai Suruhanjaya hendaklah disifatkan sebagai pekhidmat awam mengikut pengertian Kanun Keseksaan semasa menjalankan tugasnya.

Fasal 44 melarang penzahiran maklumat yang berhubungan dengan hal ehwal Suruhanjaya.

Fasal 45 bertujuan untuk mengadakan peruntukan bagi pemulaan dan penjalanan pendakwaan.

Fasal 46 memperuntukkan perlindungan kepada orang yang membantu Suruhanjaya.

Fasal 47 mengenakan kewajipan ke atas pasukan polis untuk merujuk kepada Suruhanjaya apa-apa kejadian atau insiden yang menyebabkan cedera parah atau kematian seseorang yang pada masa itu berada dalam tahanan atau jagaan pasukan polis.

Fasal 48 bertujuan untuk memperuntukkan tanggungjawab pasukan polis untuk bekerjasama dengan dan membantu Suruhanjaya, termasuk untuk memberikan apa-apa maklumat yang dikehendaki oleh Suruhanjaya.

Fasal 49 bertujuan untuk memberi kuasa kepada Perdana Menteri untuk meminda Jadual.

Fasal 50 bertujuan untuk memberi kuasa kepada Perdana Menteri untuk membuat peraturan-peraturan.

BAHAGIAN IX

10. Bahagian IX mengandungi peruntukan pemansuhan, kecualian dan peralihan berbangkit daripada pembubaran Suruhanjaya Integriti Agensi Penguatkuasaan.

IMPLIKASI KEWANGAN

Rang Undang-Undang ini akan melibatkan perbelanjaan tambahan yang amaunnya belum dapat ditentukan kepada Kerajaan.

[PN(U2)3185]